

**Malaysia Catat Pertumbuhan Kdnk Memberangsangkan Pada 6.4 Peratus, Kata Alliance Research  
Bernama  
20 Februari, 2013**

KUALA LUMPUR, 20 Feb (Bernama) -- Ekonomi Malaysia mencatatkan pertumbuhan memberangsangkan sebanyak 6.4 peratus, yang tertinggi sejak suku kedua 2010 meskipun berdepan keadaan luaran yang tidak menentu, kata Alliance Research.

Firma penyelidikan itu berkata, angka ini juga lebih kukuh berbanding unjuran pasaran pada lima peratus serta unjurannya sendiri.

Andaianya bagi pertumbuhan keluaran dalam negara kasar (KDNK) perlahan termasuk kelemahan dalam aktiviti perdagangan dan perindustrian disebabkan keadaan luaran yang amat tidak menentu terutamanya di kawasan zon Eropah.

"Kami benar-benar terkejut dengan hasil keputusan itu," kata Alliance Research dalam nota penyelidikannya, di sini, hari ini.

Di masa depan, firma itu berkata negara mungkin masih mencatatkan pertumbuhan sederhana bagi separuh pertama tahun ini disebabkan risiko kemelesetan yang berterusan di Eropah, Amerika Syarikat dan Jepun.

Suku tahun yang terisi dengan banyak cuti perayaan dan pilihan raya umum ke-13 juga dijangka menyumbang kepada risiko kelemahan itu.

"Bagaimanapun, usaha berterusan Malaysia membangunkan prasarana dijangka terus menyokong pengembangan ekonomi dalam separuh kedua tahun ini," kata firma penyelidikan itu.

Pembayaran Bantuan Rakyat 1Malaysia (BR1M), gaji tinggi dan pembayaran bonus kepada penjawat awam dijangka mengukuhkan lagi permintaan domestik dan juga ekonomi secara keseluruhan, kata Alliance Research.

Firma penyelidikan itu menjangka ekonomi domestik mencapai pertumbuhan mapan dengan sokongan peningkatan permintaan domestik meskipun kelemahan di persekitaran global tahun ini.

"Buat masa sekarang, kami mengekalkan unjuran KDNK pada sekitar lima peratus tahun ini dengan kecenderungan meningkat. Kami mungkin menyemak semula unjuran kami bagi 2013 dalam masa terdekat," kata firma itu.

Alliance Research tetap yakin tahap penggunaan domestik dan pelaburan tinggi boleh membantu menyokong sebarang kekurangan dalam tempoh jangka pendek.

"Kami menjangka Kadar Dasar Semalaman kekal stabil pada tiga peratus tahun ini," kata firma itu.

-- BERNAMA

Source: <http://www.bernama.com/bernama/v7/bm/newsindex.php?id=929217>